

# SAN PABLO KARTA FXILEMON JÏI

---

## Pablo' Fxilemona's fxi'jni

<sup>1</sup>Adxa' Jesukristo jxkaahni yuwe ewsa's pta'sxpa'gaçxáa preesu ústhu, nawa naa karta's fxi'jaçthu yakthê'j Timoteo yakh, kwe'sx yakh mjiisa Fxilemon idxa's weçxana. <sup>2</sup>Vxite' kwe'sx npe'sx Apia vxite' yakthê'j Arkipo kwe'sx yakh mjiisa vxite' iidx yatte pkhaakhesawe'sx txâawe'sxtxi weçxanath fxi'ja'. <sup>3</sup>Dxus kwe'sx Tata vxite' kwe'sxtxi jxpe'jsa Jesukristo txâawe'sx pu'çxni wêt mfxi'ze.

## Fxilemona' Kristo's úusuh jxuka yajkxna vxitetxwa peeygâani

<sup>4</sup>Bagaçxtewa Dxus yakh puutx we'we iisath idxa's yajkxna Dxusa's weçxá'. <sup>5</sup>Txâ'wê Jesukristo's yuuçxáa yajkxna yakthê'jwe'sx jxukaysatxku peeygâhna fxi'ze' jïni's jiyuçxath txâ'wê weçxá'. <sup>6</sup>Idx txâ'wê Dxus yakh fxi'zepa'ga vxitewa Dxusa's jxpa'gasa ústa' txâawe'sxwa Kristo Jesus kihtewa jxuka pu'çxni's ew jiyukahnthu Dxusa's neewe'we'. <sup>7</sup>Adxa's iiméh wala weçx weçxa úusuthek yakthê'j iidx peeygâani's jiyute', txâa pa'gatey txâ'wê iidx pa'gaçxáa vxitewa txâawe'sx úuste wêt-sa's jxpa'gatx naa pa'ga.

## Pablo Fxilemona's neewe'weni Onesimo's ewçxáa jxpa'gakahn

<sup>8</sup>Adxa' Kristo kaahnisath na' idxa's juuna' jxkaajxa' ájawa'jsath. <sup>9</sup>Nawa idx txâ'wê ewstate jiiçxa', juuna' we'wemée peeygâhnaçxáath we'we', adxa' Kristo Jesusna selpiipa'ga preesu ústhu thê'khwe yá'jsa. <sup>10</sup>Txâasath idxa's pu'çx jxthâasu' Onesimo's ewçxáa yûuna. Txâ'sa' adx nçxi'k na'wêsath Dxus jïi knay ay karcelte úsçxawa. <sup>11</sup>Nyafxii yu' idxna selpisáa Onesimo' seelpimeesak yuu. Nawa áçxha' wala seelpisa' adx yakh vxite' idx yakhwa. <sup>12</sup>Txâ'sna iidx tasxte ki' kajaçthu aç'a' miipa'ga adx yuu kxtee pa'jaç na'wê. <sup>13</sup>Adxa' Dxus yuwe's pta'sxpa'ga ay karcelte ústhu aç'a' adxna pi'kxna úswa'jsa Onesimo's kaahmeewaç wejx ewna, idxa' adx yakh pi'kxna úsya' ája'çmeeg aç'a' Onesimo úskahn. <sup>14</sup>Nawa txâ'wê

yūu wēemeeth, idxna kaajiyu'jmey yu', kxah idx adxna pu'çx wēeçxa' pu'çxhine'ga Onesimo's kaapi'ki'jna. Nawa idxa's txā'wē myūu jīna yu' jxthāasuçmeeth. <sup>15</sup>Onesimo' iidx tasxu maz en yu' txuteene', naajūyā'ja' peena yu' багаçxte yuhwa txuteeya'mée. <sup>16</sup>Nawa āçxha' selpiisáa na'wēmée, wejxwa selpiisaate jxthaakwe yakthhē'j peeygāanisa na'wē ew idx jxpe'khan ne' txā'wē yūu. Adxa' Onesimo's wala peeygāja'th, aça' idxa' wejx jxthaakwe peeygāawa'j ji'phgu, Onesimo' iidx jxpe'jnisak yu' nawa āçxha' txā'wēçxáamée, iidx yakthhē'ja' Kristo's jiisapa'ga.

<sup>17</sup>Idxa' adxa's namiku na'wē dxih yaakiççxa', Onesimo's miipa'ga, adx pa'jwaç ma'wē weçxana jxpa'gaki'g txā'wē yajkxna miipa'ga. <sup>18</sup>Idxa's āhmée wá' yuu, meeçxa' yuulwáana aça' adxna yuula's pēyine'ga. <sup>19</sup>Yuula's dukhe'nja jīna Pablo adx kuseju fxi'jni's uyçxa', wejx yuuwa adx txā'wē Pablo's yuulthu ew yūupa'ga sūjune'ga. <sup>20</sup>Yakthhē'j, txā'wē adx neewe'weni's kxtey meen yuu, Onesimo's jxpa'gana Dxusa's jiisa na'wē. Txā'wē yūuçxa', adx ūuste wēt wēt kaayaki'jine'ga.

<sup>21</sup>Txā'jīnath fxi'ja'. Idxa' kxtey yuune'ga sa' adx jxthāasnite jxthaakwe ew yūuwa'ja's jiiçxath txā'jī'. <sup>22</sup>Txā'wēçxáa yūumée, adx pa'jwa'ja'swa ūythasna mes. I'kwe'sx txā'wē Dxus yakh puutx we'wena ūste', Dxusa' kajawáana aça' maa enteya' sxawedu'nja i'kwe'sxtxi thegya'.

#### Yuwe weçxaa kaahnitx pta'sxna fxi'jni

<sup>23</sup>Kristo Jesusna selpiipa'ga karcelte adx yakh pi'kxna ūssa Epafxraswa yuwe weçxaa kaja'k, <sup>24</sup>vxite' Markos, Aristarko, Demas, Lukas txāawe'sxwa mjīi pu'çxsata' sa' weçxaa kaja'tx.

<sup>25</sup>Kwe'sxtxi jxpe'jsa Jesukristo' i'kwe'sxtxi pu'çxhina.